

0 10 20 30 40 50 60 70 80 90 100 110 120 130 140 150

67777

4 1/2 653.17

503

Kodak Color Control Patches

3
4
5
6
7
8
9
10
11
12
13
14
15
16
17
18
19
20
21
22
23
24
25
26
27
28
29
30
31
32

4920.58

4458

字第 2149 號

冊 / 函

蘇穎濱年表

蘇

頴

濱

年

譜

蘇	蘇
頴	頴
濱	濱

季	季
譜	譜

蘇頴濱年表

左奉議郎賜緋魚袋孫汝聽編

仁宗寶元二年己卯二月丁亥蘇轍生轍字子由一字同叔眉山老蘇先生之季子其世家已具老蘇先生

表中

康定元年庚辰

慶曆元年辛巳

二年壬午

三年癸未

四年甲申

五年乙酉

六年丙戌

七年丁亥

五月乙酉轍祖父序卒

八年戊子父洵以家艱閉戶讀書因以學行授二子曰是庶幾能明吾學者

皇祐元年己丑

二年庚寅

三年辛卯

四年壬辰

五年癸巳

至和元年甲午

二年乙未轍娶史氏年十五父曰瞿

嘉祐元年丙申是春轍父子三人同游京師過成都謁知益州張方平方平一見待以國士

七月癸巳以待御史范師道開封府判官祠部郎中直祕閣王疇祠部員外郎集賢校理胡俛屯田員外郎集

賢校理韓彥太常博士集賢校理王瓘太常丞集賢校理宋敏求考試開封舉人轍中其選明年登第後有謝秋試官啟

二年丁酉轍兄弟試禮部中第

三月辛巳上御崇政殿試進士 丁亥放童衡以下及

第出身轍中第五甲有上韓琦樞密書

四月癸丑轍母武陽縣君程氏卒於家轍父子還蜀

三年戊戌

四年己亥十月侍父游京師

十二月至江陵集舟中所爲詩賦一百篇爲南行集

五年庚子自江陵至京師途中所爲詩賦又七十三篇

爲南行後集轍有南行後集引

三月以選人至流內銓天章閣待制楊畋調銓官吏轍授河南府澠池縣主簿畋謂轍曰聞子求舉直言若必

無人敢願備數於是舉轍應才識兼茂明於體用科兄弟寓懷遠驛

十一月歐陽永叔爲樞密副使有賀啟

六年辛丑有上富弼丞相曾公亮參政及兩制書三首八月丁卯會翰林學士吳奎龍圖閣直學士楊敞御史中丞王疇知制誥王安石考試制科舉人於祕閣乙亥上御崇政殿策試制科舉人時上春秋高始倦於勤轍因所問極言得失覆考官司馬光第以三等初考官胡宿爭不可光與范鎮議以轍爲第四等蔡襄曰吾三司使也司會之言吾愧之而不敢怨惟胡宿以爲不遜力請黜之詔差官重定司馬光奏臣近蒙差赴崇政殿後覆考應制舉人試卷內固毡兩號所對策辭理俱高絕出倫輩然毡所對命秩之差虛實之相養等一兩事與所出差舛臣遂與范鎮同議以固爲第三等毡爲第

四等詳定官已定從覆考竊知初考官以爲不當朝廷更爲差官重定復從初考以毡爲不入等臣竊以爲國家置此六科本欲得材識高遠之士固不以文辭華靡記誦雜博爲賢毡所試文辭臣不敢言但見其指陳朝廷得失無所顧慮於四人之中最爲切直今若以此不蒙甄收則臣恐天下之人皆以爲朝廷虛設直言極諫之科而毡以直言被黜從此四方以言爲諱其於聖主寬明之德虧損不細臣區區所憂正在於此非爲臣已考爲高等苟欲遂非取勝而已也伏望陛下察臣愚心特收毡入等使天下之人皆曰毡所對事目雖有漏落陛下特以其切直收之豈不美哉旣而執政以毡所試進呈欲黜之上不許曰其言切直不可棄也乃降一等收之卽轍也己卯以轍爲試祕書省校書郎充商州軍事推官制曰朕奉先聖之緒以臨天下雖夙寤晨興

不敢康甯而常懼躬有所闕羞於前烈日御便坐以延
二三大夫垂聽而問而轍也指陳其微甚直不阿雖文
采未極條貫未究亦可謂知愛君矣朕親覽見獨嘉焉
其以轍爲州從事以試厥功克慎爾術思永脩譽時知
制誥王安石意轍右宰相專攻人主比之谷永不肯撰
詞宰相韓琦笑曰此人策語謂宰相不足用欲得婁師
德郝處俊而用之向以谷永疑之乎知制誥沈邁亦考
官也知其不然故當制有愛君之言諫官楊敞見上曰
蘇轍臣所薦也陛下赦其狂直而收之盛德之事也乞
宣付史館上悅從之轍有謝制科啟是時父洵被命編
修禮書而兄軾出簽書鳳翔判官旁無侍子轍乃奏乞
養親詔從之十二月軾赴官十九日與轍別於鄭州西
門外有辛丑除日寄子瞻詩
七年壬寅次韻子瞻減降諸縣囚徒事畢登覽詩

四月諫議大夫楊敞卒年五十六有哀詞

八月乙亥伯父利州路提點刑獄渙卒年六十二有挽
詩次韻子瞻微雪見寄詩次韻子瞻記歲暮鄉俗三首
有新論三首

八年癸卯有記歲首鄉俗寄子瞻二首寒食前一日有

寄兄詩

三月辛未仁宗崩

六月庚辰渙夫人楊氏卒有挽詩

英宗治平元年甲辰四月晦日有題上清宮辭後

十二月軾自鳳翔解官歸京師

二年乙巳轍爲大名府留守推官有謝韓丞相啟尋差
管句大名府路安撫總管司機宜文字有北京送孫曼
叔屯田權三司開拆司詩有中秋夜八絕冬有留守王
貺生日詩

三年丙午春有送陳安期都官詩

二月有寒食贈游壓沙諸君詩

四月戊申父洵卒於京師年五十八轍兄弟自汴入淮

沂江歸

十二月入峽

四年丁未正月丁巳英宗崩

十月壬申葬父彭山縣安鎮鄉可龍里

神宗熙寧元年戊申冬轍兄弟免喪東游京師

二年己酉春至京師

二月甲子參知政事王安石樞密院陳升之同制置三

司條例

三月轍上書論事 丙子上批付中書曰詳觀疏意知

轍潛心當世之務頗得其要鬱於下僚使無所伸誠亦

可惜即日召對延和殿 癸未以轍爲制置三司條例

司檢詳文字安石急於財利而不知本呂惠卿爲之謀
主轍議事率不合因以書抵安石指陳其事之不可行
者安石大怒欲加以罪陽叔止之

八月庚戌轍上言每於本司商量公事動皆不合臣已
有狀申本司具述所議不同事乞除一合入差遣上問
所以處轍曾公亮奏欲與堂除差遣上從之以轍爲河
南府留守推官乃定制策登科者不復試館職皆送審
官與合入差遣自此始 癸丑以三司度支副使蘇棗
爲集賢殿修撰知梓州有送蘇公佐詩

三年庚戌正月九日差充省試點檢試卷官

二月戊午觀文殿學士新知河南府張方平知陳州方

平奏改辟轍爲陳州教授有初到陳州詩二首

八月丙戌知成都府陸誥卒有陸介夫挽詞

九月呂陶中賢良方正科有代方平答陶啟有代張方

平論時事書

十二月王安石同平章事

四年辛亥

六月甲子歐陽脩以太子少師致仕有賀脩啟有陪歐陽公燕潁州西湖詩有次韻子瞻潁州留別詩

八月戊寅張方平除南京留臺有送方平詩

九月知制誥直學士院陳襄知陳州轍有迎襄啟

十二月次韻子瞻初到杭州見寄二首

五年壬子六月曾公亮致仕轍有賀啟

閏七月二十三日歐陽文忠公脩卒有祭文并挽詞三首

八月同頓起等於洛陽妙覺寺考試舉人及畢事共得大小詩二十六首

六年癸丑

二月重到潁州有寄軾詩二首 甲申有次韻子瞻二

月十日雪詩

四月樞密使文彥博罷以守司徒兼侍中判河陽彥博辟轍爲學官轍有謝啟已而改齊州掌書記有自陳適齊戲題詩

九月尙書右司郎中知登州李師中來知齊州

十月有京西北路轉運使題名記

七年甲寅

二月己巳朔以李師中爲天章閣待制知瀛州有師中燕別西湖詩序并送師中赴瀛州詩

四月壬辰以知青州右諫議大夫李肅之知齊州有代肅之到任謝上表有送青州簽判俞退翁致仕還湖州

詩

九月丙申有和青州教授頓起九日見寄詩有和子瞻

喜虎兒生詩

十一月辛亥有洛陽李氏園亭記

八年乙卯有和劉敏殿丞送春趙至節推首夏詩有游
太山詩四首有舜泉詩有閔子廟記及次韻徐正權謝
示閔子廟記及惠紙詩

六月辛亥吏部尚書同平章事昭文殿大學士王安石
授尚書左僕射兼門下侍郎同平章事以脩詩書周禮
義畢推恩也轍有東方書生行

九年丙辰

二月辛丑李肅之提舉南京鴻慶宮以病自請也有和
李常赴歷下道中雜詠十二首

九月有次韻李常九日見約以疾不赴詩

十月宰相王安石罷轍歸京師有自齊州回論時事書
十二月辛亥有次韻范鎮除夜詩

十年丁巳正月八日有王氏清虛堂記有次韻范鎮正
月十二日訪吳纘寺丞二絕轍以舉者改著作佐郎有
謝啟

二月癸巳以張方平爲南京留守方平辟轍簽書應天
府判官有謝方平啟時軾亦得徐州兄弟相遇於澶濮
之閒相從至徐留百餘日有逍遙堂會宿等詩有漢高
帝廟試劍石銘有漢高帝廟祈晴文徐州大水

九月轍自徐至南京有寄王鞏詩有九日送交代劉摯
詩

十月甲辰祀南郊大赦天下有代方平免陪祀表賀南
郊表并謝加恩表有除夜會飲南湖懷鞏詩張方平請
老拜東太一宮使就第以龔鼎臣知應天府

元豐元年戊午正月有次韻王鞏上元閒游見寄二首
二月寒食有游南湖詩三首

五月己卯知應天府龔鼎臣爲右諫議大夫知青州有
代鼎臣謝知青州表有送龔諫議知青州二首 戊戌
提舉醴泉觀兵部郎中陳汝羲知應天府有代謝上表
有送林子中安厚卿奉使高麗詩

七月癸巳有同李倅鈞訪趙嗣恭留飲南園晚衙先歸詩
有秋祀高辛詩有答陳州陳師仲書

八月丙辰有中秋見月寄兄詩

九月有黃樓賦有次韻張恕九日寄兄詩有次韻頓起
試徐沂舉人見寄詩二首

二年己未

正月丁丑有次韻軾人日獵城西詩 己丑資政殿大

學士知杭州趙抃以太子少保致仕有賀抃啟 庚寅

新知湖州文同卒於陳州有祭與可文

二月丁巳以軾知湖州有和軾自徐移湖將至宋都途

中見寄五首

四月三日有古今家誠序有代張方平乞致仕表

七月甲戌以宣徽南院使東太一宮使張方平爲太子

少師宣徽南院使致仕有代方平謝表

八月軾下御史臺獄轍上書乞納在身官贖兄罪不報

十二月癸亥軾責授水部員外郎黃州團練副使轍亦

坐貶監筠州鹽酒稅

三年庚申自南京適筠有過龜山詩高郵別秦觀詩揚

州五詠游金山詩初至金陵詩池州蕭丞相樓詩二首

過九華詩佛池口遇風雨詩

五月至黃州有陪軾游武昌西山詩

六月有自黃州還江州詩有游廬山詩南康阻風游東

林寺詩至筠有次韻筠守毛維瞻司封觀修城詩三首

八月乙巳有中秋對月二首次子瞻夜字韻

九月戊辰有次韻毛君九日詩 辛未屯田郎劉渙凝
之卒有哀詞

十二月丙寅有東軒記

四年辛酉

五月癸巳有廬山新脩僧堂記

六月壬申有聖壽院法堂記

七月甲午有吳氏浩然堂記有送王適徐州赴舉詩

八月有試院唱酬十一首

九月有聖祖殿記

十二月有黃州師中庵記

五年壬戌有上高縣學記有送毛君司封致仕還鄉詩

六年癸亥正月丁丑朔有次韻王適元日并示曹煥二

詩

閏六月有次韻王適大水詩

四月丙辰朔中書舍人曾鞏卒有挽詞

七月丙辰國子司業朱服言諸州學或不置教授乞委
長吏選見任官兼充先以名上禮部從本監體驗可爲
教授卽依所乞其餘逐州舊補差教授悉乞放罷仍錄
進轍權筠州教授所撰策題三道以其乖戾經旨禮部
言見爲教授人候有新官令罷其蘇轍乞令本路別差
官兼管句從之有次韻賈蕃大夫思歸詩

八月有庭中種松竹詩

九月癸酉有書事詩

十一月壬寅朔有黃州快哉亭記

十二月文彥博致仕轍有賀啟 庚子有除夜詩

七年甲子

正月乙卯有上元夜詩并次韻王適上元夜二首

二月有次韻王適一百五日太平寺看花二絕子瞻自

黃移汝

三月癸卯有次韻子瞻特來高安相別卻寄邁迨過遞
詩并和端午日與遲迨遠三子游真如寺詩次韻子瞻
贈別詩

七月乙丑軾幼子邁卒有勉子瞻夫幹子詩二首

九月以轍爲歙州績溪令有謝洞山石臺遠來訪別詩
乘小舟出筠江詩除夜宿彭蠡遇大風雪詩

八年乙丑正月丙申朔有正旦夜夢李志甯詩并舟中
風雪五絕 己酉有南康軍直節堂記并太守宅五老

亭詩有再游廬山詩至績溪有謁城隍神孔子廟文視
事三日有出城南謁二祠游石照寺詩有縣中諸花多
交代江汝明所種牡丹已過芍藥方開詩

三月戊戌神宗崩哲宗卽位大赦天下有代歙州賀登
極表轍始至邑適有朝旨江東諸郡市廣西戰馬江東

素乏馬每縣雖不過十餘疋而諸縣括民馬吏緣爲姦
有馬之家爲之騷然轍謂縣尉郭惇愿曰廣西取馬使
臣未至事忌太遽徐爲之備可也邑孰爲有馬者惇愿
曰邑有遞馬簿歲月遠矣然有無之實尙得其平也卽
取簿封之又曰何從得馬牙人乎曰召粥羊豕者詰之
則馬牙出矣果得會人市馬者辭以不能曰吾不責汝
以馬但爲我供文書耳曰諾州符日至縣督責買馬乃
以夏稅過期爲名召諸鄉保正副驟問之曰汝保誰爲
有及格馬者相顧辭不知曰保正副不知誰則知之第
勿以有爲無以無爲有則免罪矣汝等所具吾將使人
訴其不實而陳其脫略者不可不實也人知不免皆以
實告復諭之曰買馬事止此矣廣西取馬者至郡則馬
出若不至則已矣皆再拜曰邑人幸矣然取馬者卒不
至

五月轍臥疾至秋良愈有病退詩有病後白髮詩

八月戊午資政殿學士司馬光爲門下侍郎 丁卯以

轍爲祕書省校書郎有初得校書郎示同官三絕有答

王定國問疾詩有辭靈惠廟歸過新興院詩過桐廬有

游桐君山寺詩

十月己巳有游杭州天竺寺詩 丁丑以轍爲右司諫

哲宗元祐元年丙寅轍至京師

二月癸酉有論臺諫言事留中不行狀 甲戌有久旱

放民間積欠狀 乙亥有論罷免役錢行差役法狀

丙子有送陳睦出守潭州詩 癸未有論蜀茶五害狀

丙戌有乞選用執政狀

閏二月乙丑朔有乞罷左右僕射蔡確韓縝狀 庚寅

確罷爲觀文殿大學士知陳州以門下侍郎司馬光爲

左僕射是日有乞罷蔡京知開封府狀 壬辰轍言陞

下以久旱憂禱勤至自冬歷春天意未答災害廣遠又

近歲民苦重斂儲積空匱應官債負有資產耗竭實不

能出者令州縣監司保明除放使民心說附詔戶部勘

會諸欠官本息罰錢并免役坊場淨利錢數目及民戶

見有無抵當物力具保明以聞 甲午右諫大夫孫覺

同轍進對有旨俟簾下內臣盡出方敷奏是日有乞罷

右僕射韓縝劄子 壬寅有乞招河北保甲充軍以消

盜賊狀 癸卯有差役五事狀 甲辰有乞黜降韓縝

狀 丙午轍言竊見近日以蜀中賣鹽榷茶及市易比

較爲人疾苦委成都提點刑獄郭槩體量事實臣觀此

三事利害易見而槩畏憚茶官陸師閔不敢依限體量

足以見其意在拖延始因提舉官韓玠收息增羨槩以

韓玠叔祖縝見任右僕射意欲趨附妄言韓玠不曾以

戶口比較息錢又代說詞理已在赦前槩謂朝廷不合

相度赦前之事附下罔上乞罷黜郭槩別委官體量詔
郭槩特差替其賣鹽市易令黃廉先次體量詣實以聞
有乞罷音惇知樞密院狀并乞牽復英州別駕鄭俠狀
庚戌知開封府蔡京出知成德軍 辛亥有廢官水
磨狀并乞葬埋城外白骨狀是日音惇罷知汝州 壬
子有乞振救淮南飢民狀 甲寅有乞罷蔡京知真定
府狀 丙辰有乞罷安燾知樞密院狀
三月乙未再有再論安燾狀 乙丑有論發運司以糶糴
米代諸路上供狀 丁卯有乞責降韓縝第七狀 壬
申有乞責降韓縝第八狀 甲戌有乞給還京西水櫃
所易民田狀 庚辰有論三省事多留滯狀
四月己丑右僕射韓縝罷知潁昌府 庚寅有言科場
事狀 丙申有招畿縣保甲充軍狀 庚子有乞令戶
部役法所會議狀 己酉有乞禁軍日一教狀 壬子

有乞差官與黃廉同體量蜀茶狀 乙卯乞以發運司
米救淮南飢民狀

五月壬戌有論明堂神位狀 甲子有乞借常平錢買

上供及諸州軍糧狀 丁卯有論蔡京知開府不公第

五狀 乙亥有乞誅竄呂惠卿狀 丁丑有再乞差官

同黃廉體量茶法狀 壬午有再言役法劄子 乙酉

有乞責降呂和卿狀

六月己丑有乞兄子邁罷德興尉狀 甲午有再乞罪

呂惠卿狀 戊戌呂和卿責知台州 庚子有論青苗

狀 壬寅資政大學士正議大夫提舉西京嵩山崇福

宮呂惠卿落職降中散大夫光祿卿分司南京蘇州居

住 甲辰有三論差役狀 丙午有論呂惠卿第三狀

辛亥再責惠卿爲建武軍節度副使建州安置不得

簽書公事 甲寅有論蘭州池狀

七月壬戌有再論蘭州池狀 甲子有論京畿保甲冬
教等事狀 甲戌有論西邊警備狀 己卯有再論青
苗錢狀 壬午有乞放市易欠錢狀 癸未以刑部郎
中杜紘爲右司郎中 甲申有言淮南水潦狀
八月丙戌朔有乞罷杜紘右司郎中狀 丁亥有論差
除監司不當狀 己丑有乞罷青苗錢狀并申三省狀
辛亥詔諸路提刑司自今後常平司錢穀令州縣依
舊法糴糶其青苗錢更不俵散 壬辰有再言杜紘狀
癸巳有言張瑛劄子請罷右職縣尉劄子論戶部張
頡劄子 丙申有再言張瑛狀 丁酉有言張頡第三
狀 己亥有言責降官不當帶觀察團練使狀 癸卯
有言張頡第四狀 甲辰以轍爲起居郎有辭免二狀
丙午有論傅堯俞等謂司馬光爲司馬相公狀 戊
申有言張頡第五狀辭起居舍人第二狀 辛亥有申

三省論張頡狀轍權中書舍人

九月己卯中書侍郎張瑛罷知鄭州有制

十一月丙子轍召試中書舍人 戊寅制曰在昔典謨

訓誥誓命之文爲體不同而其旨無二學者宗之以爲
大訓蓋當是時豈特經紀法度後世有不能及哉至於
左右言語之臣皆聖人之徒亦非後世之士所能髣髴
也斯道未墜得人則興庶幾先王朕竊有志具官某學
有家法名重天下高文大冊爲國之光追懷古風有望
於汝矧夫身備近侍職在論思位於西臺實與政事以
爾器識足以輔余不及以爾諒直足以行其所知兼是
數長朕命惟允任重於己責難於君在爾勉之以永終
譽可中書舍人有辭免狀二謝表二

十一月戊午尙書右丞呂大防爲中書侍郎御史中丞
劉摯爲尙書右丞有大防摯制

十二月丁亥有論梁惟簡除遙郡刺史不當狀 庚寅
有不撰葉康直秦州告狀

二年丁卯正月辛巳以給事中顧臨爲河北都轉運使
有送臨詩

五月己巳太師文彥博等言伏奉詔旨以時雨愆期太
皇太后陛下憂閔元元側身脩行躬自貶薄以奉天戒
權停受冊之禮今時雨溥注二麥既登秋稼有望正名
定位義不可後謹據太史局選定八月初四崇上徽號
不許轍有請太皇太后受冊表 戊申尙書左丞李清
臣以資政殿學士知河陽有制 辛未集賢殿脩撰知
陳州鮮于侁卒有子駿哀詞

七月辛未有門下侍郎韓維爲資政殿大學士知鄧州
制

八月丁未熙河蘭會路經略司言今月十九日岷州行

營將官种誼收復洮州禽西蕃大首領鬼章有賀表

戊申宰相率百官賀於延和殿轍有賀表有論西事狀

九月甲子以講論語終篇賜宰臣執政經筵官宴於東
宮轍有謝講論語賜宴表

十月以奉安神御於西京轍先告裕陵 壬午還過鄭

州列子觀有御風辭一首 甲辰有游師雄除陝西路
轉運判官制

十一月甲戌以轍依前朝奉郎試戶部侍郎有辭免劄

子并謝表二言者論買撲場務人自熙甯初至元豐末

多有四界少有三界緣有實封投狀添價之法小民爭

得務勝不復計較利害自始至末添錢多者至十倍由

此破蕩家產傍及保戶猶不能足父子流離深可閔卹

乞取累界內酌中一界爲額除元額已足外其元額雖

未足而於酌中額得足並與釋放唯未足者依舊催理

及酌中額而止轍善其說奏請施行之天下欠戶蒙賜者不可勝數

十二月戊申宿齋於右曹

三年戊辰

正月己酉朔有三絕句寄軾 辛亥祈穀

三月丙辰韓康公絳卒有挽詞三首 丁未上策試進

士 戊午策試武舉於集英殿以轍及王欽臣等爲考官轍有廷試武舉策問一首有次韻欽臣集英殿并詩

己巳賜進士及第出身有考試罷二首

四月戊寅以文思副使兼閣門通事舍人高士敦爲成都府利州路兵馬鈐轄有送士敦詩

五月丙午朔文德殿轉對有論事狀有詩

六月癸卯以承議郎程之元爲江南西路轉運判官有送之元奉使江西詩 丙辰以朝請大夫考工郎中周

尹知梓州有送尹兼簡呂陶二絕

九月辛亥以御史中丞孫覺并轍中書舍人彭汝礪祕書正字張績考試制科舉人有呈同舍諸公二首有次韻續院中感懷一首

十一月癸卯朔有次韻軾旦日鎖院賜酒及燭詩有祭范景仁文

四年己巳

正月癸巳鄭州王克臣卒有挽詞

二月甲申司空申國公呂公著卒有呂司空挽詞三首 六月辛丑朔丁未以轍爲吏部侍郎有辭免劄子 辛

未以轍爲翰林學士知制誥有辭免劄子謝宣召狀謝賜對衣金帶鞍馬謝敕設狀

八月辛丑以轍及刑部侍郎趙君錫爲賀遼國生辰國信使 己未范鎮葬汝州襄城子百嘉百歲附焉轍有

蜀公挽詞三首百嘉百歲挽詞二首 辛酉撰太皇太后將來明堂禮成罷賀賜門下手詔

九月丙子有將使契丹九日對酒懷子瞻兄并示坐中

詩 戊寅上齋於垂拱殿百官齋於明堂 己卯薦饗

景靈宮 庚辰齋於垂拱殿有皇帝宿齋明堂問太皇

太后皇太后皇太妃聖體答書六首 辛未大享明堂

禮畢御宣德門肆赦有皇帝謝禮畢太皇太后皇太后

皇太妃答書有宰相呂大防皇伯祖叔祖皇弟并馮京

劉昌祚加恩制有歐陽文忠公夫人薛氏墓志銘

十月戊戌轍進呈神宗皇帝御集命宰執觀讀呂大防

讀詩數篇太皇太后泣下 壬辰轍壻王適卒轍至契

丹虜主以其侍讀學士王師儒館伴師儒稍讀書能道

轍父兄所爲文曰恨未見公全集然亦能誦服袂芩賦

等虜中愛敬之轍君錫使還過相州有祭韓忠獻公文

五年庚午有王子立秀才文集引

二月庚戌太師文彥博除開府儀同三司河東節度使

致仕有除彥博制有河東官吏軍民示喻敕書有送彥

博致仕還洛詩三首

三月壬申以尙書左丞韓忠彥同知樞密院事以翰林

學士承旨蘇頌爲尙書右丞有賜忠彥頌辭免不允詔有

賜知樞密院孫固乞致仕不許不允詔 己卯以知毫

州鄧温伯爲翰林學士承旨

四月有乞罷五月朔旦朝會劄子上從之 丁巳轍有

太皇太后皇帝以旱賜門下避殿減膳罷五月朔文德

殿視朝手詔二首 辛酉有除馮京司空彰德軍節度

使再任知大名府制有彰德軍官吏軍民示喻敕書

五月己巳有端午帖子二十七首 乙亥羣臣詣閣門

拜表請御正殿復常膳有不許不允批答自是四上表

乃從之 壬辰以轍爲龍圖閣直學士御史中丞有辭
免劄子并謝表

六月辛丑以禮部侍郎陸佃權禮部尙書兵部侍郎趙
彥若權兵部尙書轍有論執政生事劄子有分別邪正
劄子自元祐初革新庶政至是五年矣一時人心已定
惟元豐舊黨分布中外多起邪說以搖撼在位呂大防
及中書侍郎劉摯尤畏之遂建言欲引用其黨以平舊
怨謂之調停宣仁后疑不決轍於廷和面論其非退復
再以劄子論之反復深切宣仁后命宰執於簾前讀之
仍喻之曰蘇轍疑吾君臣遂兼用邪正其言極中理諸
公相從和之自是參用邪正之說衰矣

八月丙辰轍言新除知荊州王光祖不當詔以光祖爲
太原府路總管
九月八日有論役法五事劄子

十月己酉以徐君平虞策並爲監察御史從轍薦也又
言新除知順安軍王安世罪狀詔罷爲京西南路都監
其違法事令都水監依條施行 癸丑轍有裁損待高
麗事件劄子從之 乙卯龍圖閣學士滕元發卒轍有
乞優卹元發家劄子

十二月辛卯尙書右丞許將罷爲資政殿學士知許州
甲辰殿中侍御史上官均言右丞許將不當罷執政
中丞蘇轍侍御史孫升等附會大臣意指姦邪不忠臣
竊聞外議以爲轍等合爲朋黨動移聖意以疑似不明
細事合請併力逐一執政自此大臣人人不得安位矣
伏乞早賜施行以協中外之望詔罷均知廣德軍 丁
未以轍爲龍圖閣學士

六年辛未二月庚寅朔 辛卯門下侍郎劉摯爲尙書
右僕射兼中書侍郎 癸巳以轍爲中大夫守尙書右

蘇軾年表
丞有辭免劄子四首轍言兄軾召還本除吏部尚書以
臣之故除翰林學士承旨臣之私意尤不違安乞寢新
命與兄軾同備從官詔不許有謝表二首 己酉有謝
生日表二首

八月辛亥以軾爲龍圖閣學士知潁州有次韻子瞻感
舊詩有乞外任劄子

十月庚戌上朝獻景靈宮因幸太學有次韻門下呂相
公車駕視學詩 甲戌以王鞏得罪自劾家居待罪遣
中使賜詔不允

十一月乙酉朔右僕射劉摯以觀文殿學士知鄆州
庚子監察御史安鼎罷知絳州先是鼎與趙君錫賈易
同造飛語誣罔兄軾惡逆之罪君錫易旣謫去鼎猶在
言路復因王鞏事攻轍甚急宣仁察其誣故斥黜之
辛丑中書侍郎傅堯俞卒有挽辭

十二月乙卯朔張文定公方平卒 甲戌有祭方平文

丁丑有李簡夫少卿詩集序

七年壬申二月癸酉有生日謝表二首

四月以轍攝太尉充冊皇后告期使

五月戊戌立皇后孟氏

六月辛酉以轍爲大中大夫守門下侍郎有辭免劄子
一首表二首謝表二首

八月有祭輿可及文逸民文二首 癸酉故龍圖閣學

士滕甫葬有甫挽詞二首

九月壬辰太皇太后垂簾三省進呈翰林學士顧臨等
郊祀議太皇太后曰宜依仁宗先帝故事呂大防蘇頌
與轍請合祭唯范百祿議不同 甲午再進呈太皇太
后宣諭曰皇帝卽位以來未嘗親祀天地今且合祭宜
有名也令學士院降詔

十一月癸巳合祭天地於圜（巳）大赦天下有進郊祀慶成詩并狀以郊祀恩特加護軍進開國伯食實封二百戶有乞免加恩表二首謝加恩表二首

八年癸酉正月癸巳有次韻子瞻上元扈從觀燈詩
二月丁卯有謝生日表二首

三月丁亥監察御史董敦逸言轍及范百祿差除不當事留中不下轍奏臣近以御史董敦逸言川人大盛差知梓州馮如晦不當指爲臣過遂具劄子及面陳本末尋蒙德音宣諭察敦逸之妄而以臣言爲信臣德望淺薄言者輕相誣罔若非聖明在上心知邪正所在則孤危之蹤難以自安切詳敦逸所言謂馮如晦事乃其前狀所言之一則其餘事不可不辨遂乞一一付外施行復蒙再三宣諭以謂其他別無實事伏惟聖恩深厚知臣愚拙曲加庇護仰涵恩造死生不忘然臣忝備執政

知人言臣過惡而嘿然不辨實難安職陛下愛臣雖深而不令臣得知敦逸所言臣竊有所未諭也若敦逸所言果中臣病何惜使臣引去以謝朝廷若敦逸所言不實亦使臣略加別白然後出入左右粗免愧恥如不蒙開允非所以愛臣也所有董敦逸言臣章疏伏乞早賜付三省施行 己丑有北流輓堰劄子

四月甲子以李清臣爲吏部尚書給事中范祖禹封還詔書進呈不允轍於簾前極論之 己卯罷

五月丙申董敦逸罷知臨江軍

六月己未賜知穎昌府范純仁詔書召赴闕

七月丙子以純仁爲右僕射兼門下侍郎

八月庚申張方平葬有祭方平文并挽詞 辛酉太皇

太后不豫 壬戌呂大防范純仁蘇轍鄭雍韓忠彥劉

奉世入問聖體

九月戊寅太皇太后高氏崩 乙酉詔輟撰大行太皇太后諡冊文 癸巳有祭兄嫂同安郡君王氏文 十一月戊子三省樞密院同進呈中書舍人呂希純封還劉惟簡等除內侍省押班詞頭上曰禁中闕人兼亦有近例呂大防奏曰雖有此眾論頗有未安輟曰此事非謂無例蓋為親政之初中外拭目以觀聖德首先擢用內臣故眾心驚疑耳然臣等昨來開陳不盡不能仰回聖意致使宣布於外以至有司封駁此皆臣等之罪劉奉世曰雖有近例外人不可戶曉但以率先施行為非耳大防曰致令人言洩瀆聖聽此實臣罪今若不從其言其餘舍人亦必未肯奉行轉益滋章於體不便臣聞太祖一日退朝有不悅之色左右覺而問之太祖曰適對臣僚指揮事有失當至今悔之也以此見人主不以無失為明以能悔而改之為善耳上釋然曰除命且

留俟祈廟取旨可也輟又奏竊聞仁宗聽政之初卽下手詔凡內批轉官或與差遣並未得施行仰中書樞密院審取處分史臣記之曰是時上方親閱庶政中外聞之人情大悅正與今日事相類耳矣大防等知上從善如流莫不欣幸 壬辰輟言奉敕撰大行太皇太后諡冊文謹先進呈詔恭依 壬寅輟奏准敕差篆太皇太后諡寶文太常寺狀合依所請到諡以宣仁聖烈皇后之寶為文

十二月己巳羣臣詣慶壽宮上大行太皇太后諡冊

紹聖元年甲戌 正月丁丑詔禮部給度牒千付東京等路體量振濟司募人入粟

二月司農卿王孝先言振濟之餘軍糧匱竭又送伴北使張元方等還言相滑等州飢民眾多倉廩空虛輟見

范純仁鄭雍議曰此事豈可不令上知二人皆不欲曰
侍郎何以爲計卻恐上問及轍曰雖未知所出然當令
上知之昔真宗初卽位李沆爲相每以四方水旱盜賊
聞奏參知政事王且謂沆曰今天下幸無事不宜以細
事撓上聽沆曰人主年少當令聞四方艱難不爾侈心
一生無如之何吾老不及見此參政異日憂也純仁曰
善劉奉世曰誠宜先白若上先言極不便旣而純仁奏
近日張元方自河朔來言流民甚眾轍曰元方言相州
見養流民四萬餘人通利軍一萬餘人滑州二千餘人
然軍中月糧止支一年其餘盡令坐倉蓋倉廩已空矣
恐別生事上曰爲之奈何轍曰滑州已支山陵餘糧萬
石與之可以支持兩月耳兼京東振濟司準備應副又
京糧食太多提刑司又太多已令安撫轉運司再相度
矣俟見得去著更議應副又京城振濟應副備至然省

倉軍糧止有二年五月備臣曾令王孝先具的實數子
在此上曰何其寡備至此轍曰非一日之故蓋累年官
賣米太多去年臣與呂大防商量限市價九十已上乃
出糶今爲飢饉止賣六十蓋不得已也熙甯初臣在條
例司竊見是年有九年以下糧上曰須九年乃可轍曰
九年未易遽置但陛下常以爲意慎事惜費令三五年
間有三五年備亦漸可也臣之愚意以爲朝廷新經大
喪繼以飢饉匱乏若災止如此尙可萬一更水旱何以
繼之方今正是君臣恐懼脩省之日不可不知耳丁
未以戶部尙書李清臣爲中書侍郎兵部尙書鄧溫伯
爲尙書右丞二人久在外不得志遂以元豐事激怒上
意清臣尤力已酉葬宣仁聖烈皇后於永厚陵轍有
挽詞二首已未虞主祔廟
三月乙亥左僕射呂大防罷爲觀文殿大學士知潁昌

府 乙酉上御集英殿策試進士李清臣撰策題卽爲邪說以扇惑羣聽轍上疏曰伏見御試策題歷詆近歲行事有欲復熙寧元豐故事之意臣備位執政不敢不言然臣竊料陛下本無此心其必有人妄意陛下牽於父子之恩不復深究是非遠慮安危故勸陛下復行此事此所謂小人之愛君取快於一時非忠臣之愛君以安社稷爲悅者也臣竊見神宗皇帝以天縱之才行大有爲之志其所施設度越前古蓋有百世而不可改者也臣請爲陛下指陳其略先帝在位近二十年而終身不受尊號裁損宗室恩止祖免減朝廷無窮之費出賣坊場願募衙門前免民間破家之患罷黜諸科誦數之學訓練諸將慵惰之兵置寄祿之官復六曹之舊嚴重祿之法禁交謁之私行淺攻之策以制西戎收六色之錢以寬雜役凡如此類皆先帝之睿算有利無害而元

祐以來上下奉行未嘗失墜者也至於他事有失當何世無之父作之於前子救之於後前後相濟此則聖人之孝也漢武帝外事四夷內興宮室財用匱竭於是脩鹽鐵榷酤均輸之政民不堪命幾至大亂昭帝委任霍光罷去煩苛漢室乃定光武顯宗以察爲明以讖決事天下恐懼人懷不安章帝卽位深鑒其失代之以寬豈弟之政後世稱焉及我本朝眞宗皇帝右文偃革號稱太平羣臣因其極盛爲天書之說及章獻明肅太后臨御攬大臣之議藏書梓宮以泯其迹仁宗聽政亦絕口不言天下至今韙之英宗皇帝自藩邸入繼大臣過計創濮廟之議朝廷爲之洵洵者數年及先帝嗣位或請復舉其事寢而不答遂以安靖夫以漢昭章之賢與吾仁宗神宗之聖豈其薄於孝敬而輕事變易也哉蓋有不得不以廟社爲重故也是以子孫旣獲孝敬之實而

父祖不失聖明之稱此眞明君之所務不可與流俗議也臣不勝區區願陛下反覆臣言慎勿輕事改易若輕變九年已行之事擢任累歲不用之人人懷私忿而以先帝爲詞則大事去矣奏人不報再以劄子面論之上不悅曰人臣言事何所害但卿昨日以劄子奏謂機事不可宣於外請祕而不出今日乃對眾陳之且引漢武帝以上比先帝引喻甚失當轍曰漢武帝明主也上曰卿所奏言漢武帝外事四夷內與宮室立鹽鐵權酷均輸之法其意止謂武帝窮兵黷武末年下哀痛之詔豈明主也范純仁進曰武帝雄材大略史無貶詞況轍所論事與時也非論人也上意稍解轍退上奏今者偶因政事懷有所見輒欲傾盡以報知遇而天資闇冥不達機務論事失當冒犯天威不敢自安伏乞聖慈憐臣不識忌諱出於至愚少寬刑誅特賜屏逐以允公議李鄧

從而媒蘖之 丁酉除端明殿學士知汝州告辭略曰文學風節天下所聞擢任大臣本出朕心事有可否固宜指陳而言或過中引義非是朕雖曲爲含忍在爾自亦難安原誠終是愛君薄責尙期改過上批蘇轍引用漢武故事比擬先帝事體失當所進入詞語不著事實朕進退大臣非率易也蓋義不得已可止以本官知汝州仍別撰詞進入制曰朕以眇躬上承烈考之緒夙夜祇飭懼無以丕揚休功實賴左右輔弼之臣克承厥志其或身在此地倡爲姦言怫於眾聞朕不敢赦大中大夫守門下侍郎蘇轍頃被選擢與聞事機義當協恭以輔初政而乃忘體國之義徇習非之私始則密奏以指陳終於宣言以眩聽至引漢武上方先朝欲以窮奢黷武之資加之經德秉哲之主言而及此其心謂何宜解東臺之官出守列郡之寄尙爲寬典姑務省循可特授

依前大中大夫知汝州

四月壬戌轍至汝州有謝上表是日以提舉杭州洞霄宮章惇爲尚書左僕射兼門下侍郎右僕射范純仁罷爲觀文殿大學士知潁昌府 丁卯有謝雨文有汝州

楊文公詩石記

五月癸卯侍御史虞策殿中侍御史來之邵并亮采言轍近以論事失當責守汝州而吳安詩草制有風節天下所聞及原誠本於愛君之語命詞乖刺如此質之公議難逭典刑又監察御史郭知章言安詩行蘇轍誥重輕止徇於私情褒貶不歸於公議不加黜責何以懲戒詔安詩罷起居郎 乙巳虞策言大中大夫知汝州蘇轍引漢武帝比先朝止守近郡請遠謫以懲其咎上曰已謫矣可止也 乙丑有龍興寺吳畫殿記

六月甲戌右正言上官均言近具劄子論奏前宰臣呂

大防門下侍郎蘇轍擅權欺君竊弄威福及前御史中丞李之純等朋邪誣罔同惡相濟乞明正典刑以服中外既及旬浹未蒙施行臣以爲人主之所以臨制天下爲腹心之臣者莫重於執政爲耳目之官者莫重於諫官審詔誥慎出納者莫重於舍人給事呂大防蘇轍擅操國柄不畏公議引用柔邪之臣如李之純輩充塞要路以固寵祿又以張耒秦觀撰次國史曲明大防輩改變法度之功是以人主賞罰私其好惡其罪一也同時執政如胡宗愈許將劉摯蘇頌皆以與呂大防蘇轍議論異同轍陰諭諫官御史死力排擊卒皆斥罷敢以姦謀轉移陛下腹心之臣易於反掌其罪二也李之純頃在成都與呂大防相善大防秉政引用之純爲侍御又除知開封府之純尹京無狀又府舍遺火延燒殆盡法當譴責反挾私愛擢爲御史中丞楊畏虞策來之邵等

皆任爲諫官御史是四人者傾險柔邪嗜利無恥其所
彈擊者皆受大防蘇轍密諭或附會風指以濟其欲是
以天下耳目之官佐其喜怒以塗蔽朝廷之視聽其罪
三也舍人主出制命給事中主行封駁命令有未善差
除有未當皆許繳駁如范祖禹喬執中吳安詩呂希純
四人者皆附會呂大防蘇轍好惡隨意上下不惜公論
其所繳駁者皆大防蘇轍之所惡其所掩蔽者皆大防
蘇轍之所愛是以天子掌誥命出納之臣濟其好惡其
罪四也呂大防自爲執政以至宰相凡八九年最爲歲
久蘇轍執政雖止三四年而強很徇私尤甚如隳壞先
帝役法官制學校科舉之制士民失業棄先帝經畫塞
徼要害之地招西戎侵侮邊陲之患至今未弭其罪五
也呂大防蘇轍身爲大臣義當竭忠盡公以輔佐人主
乃便辟柔佞陰結宦官陳衍伺探宮禁密旨以固寵祿

其罪六也大防蘇轍同惡相濟固非一日李之純楊畏
虞策來之邵爲朝廷耳目曾不糾察反陰相黨附以圖
進用御史黃慶基董敦逸憤發彈奏蘇轍等專權之罪
罷斥爲轉運判官李之純楊畏來之邵希附軾轍等反
指慶基敦逸以爲誣陷忠良不當除監司遂謫守軍壘
陛下旣親機務洞分邪正軾轍旣已斥罷來之邵輩方
始奏論其朋邪罔上趨時附勢情狀明白眾所共知非
臣之私言臆度也李之純旣已罷免尙書謫守單州今
楊畏尙爲禮部侍郎來之邵爲侍御史虞策爲起居郎
喬執中爲給事中范祖禹呂希純雖出守外郡皆尙除
待制罪同罰異此中外之所未喻也議者以爲李之純
柔懦無能迨爲中丞其所附呂大防蘇轍指意彈擊皆
楊畏來之邵朝夕說喻脅持爲之二子姦險過於之純
之純旣已斥謫而二人尙居清要哆然自得曾不愧避

臣聞治國之要莫先於辨邪正欲辨邪正莫若驗之以事今楊畏輩邪險之情皆已明驗若不加斥遠方俾安要近則是邪正兼容忠佞雜處蠹敗國政理之必然竊觀陛下自親機務收還權會大防蘇轍黨人十已去八九然楊畏等六人尙居清要未快士論伏望陛下考察呂大防蘇轍擅權欺君姦邪不忠之罪推究楊畏等朋邪害正趨時反覆之惡譴責黜免明正典刑以示天下制曰事君者有犯勿欺所以盡爲臣之節無禮必逐豈容逃慢上之誅大中大夫知汝州蘇轍父子兄弟挾機權變詐之學驚愚惑眾轍昔以賢良方正對策於庭專斥上躬固有愚志有司言轍懷姦不忠如漢谷永宜在罷黜我仁祖優容特命以官在神考時獻書縱言時事召見詢訪使與討論與軾大倡醜言未嘗加罪仰惟二聖厚恩宜何以報垂簾之初老姦擅國置在言路使詆

先朝以君父爲仇無復臣子之義懷忮深阻出其天資援引猥浮盜竊名器專恣可否疇敢誰何至於大防中分國柄罔上則合謀取勝徇私則立黨相傾排嫉忠良眩亂風俗旣洞察險詖肆誕謾假設虛詞規喧朝聽比雖薄責未厭公言繼覽奏封交疏惡狀維爾自廢忠順之道而予務全終始之恩甫屈刑章尙假民社往自循省毋速後愆可特降左朝議大夫知袁州

七月丁巳三省言近聞朝廷以呂大防劉摯蘇轍落職降官黜知小郡臣始以謂陛下慈厚不欲盡言姑示薄責而已今觀制詞在大防則曰睥睨兩宮呼吸羣助誣累慈訓包藏禍心在劉摯則曰誣詆聖考愚視朕躬窺伺禁省密爲離閒在轍則曰老姦擅國肆詆先朝以君父爲仇無臣子之義旣及此矣則罪重謫輕情法相遠伏望更加詳酌以正其罪監察御史周秩言朝廷議呂

大防劉摯落職降蘇轍三官知小郡臣愚竊以爲未也
大防等罪尙可以爲民師帥乎然大防與摯始責姑易
地再施行猶可也轍之責已再三矣而止於降官則不
若未責而更容臣等極論之也臣愚謂大防等罪不在
蘇轍之下大防摯轍是皆言之而又行之者也蓋大防
等所言所行皆害先朝之事彼得罪於先朝而輕論之
它日有得罪於陛下者而重論之於義安乎呂惠卿以
沮難司馬光罪至散官安置則爲人臣冒犯人主勿犯
權臣爲得計也且摯與轍譏斥先朝不減於軾大防又
用軾之所謀所言而得罪輕於蘇軾天下必以爲非詔
司馬光呂公著各追所贈官并諡告及追所賜神道碑
額降授左朝議大夫知隨州呂大防守本官行祕書監
分司南京鄧州居住降授左朝議大夫知黃州劉摯守
本官試光祿卿分司南京蘄州居住降授左朝議大夫

知袁州轍守本官試少府監分司南京筠州居住轍在
郡有異政既罷去父老送者皆嗚咽流涕數十里不絕
八月過眞州有阻風詩行至江州彭澤縣被筠州之命
九月癸亥至筠有謝表

二年乙亥正月壬子有次韻兄惠州上元見寄詩 甲
辰有曹谿卓錫泉銘

二月辛卯有古史後序一首
九月戊申逍遙聽老卒有塔碑 辛未饗明堂大赦天
下轍有賀表

三年丙子二月有益中石菖蒲忽生九花一首

三月乙未有害寶月大師文并送成都僧法舟西歸詩
四年丁丑二月庚辰三省言呂大防劉摯蘇轍爲臣不
忠朝廷雖嘗懲責而罰不稱愆其餘同惡相濟幸免者
甚眾亦當量罪示有懲艾詔大防責舒州團練副使循

州安置劉摯鼎州團練副使新州安置又制曰朋姦擅國責有餘辜造訕欺天理不可赦其加顯黜以正明刑降授左朝議大夫試少府監分司南京筠州居住蘇轍操傾側孽臣之心挾縱橫策士之計始與兄軾肆爲詆欺晚同相光協濟險惡造無根之詞而欺世聚不逞之黨以蔽朝謂邪說爲讜言指善政爲苛法矯誣太后愚弄冲人助成姦謀交毀先烈發怨懟於君臣之際忘忌憚於父子之間陰懷動搖公肆排訐粵子親政尙爾撓權持罔上之素心爲怙終之私計罪同首惡法在嚴誅而事久益彰罰輕未稱朕願瞻嚴廟趾念裕陵義不敢私恩難以貸黜居散秩投置遐陬非徒今日知馭眾之威亦使後世識爲臣之義勉思寬憲務益往愆可責授化州別駕雷州安置

閏二月甲辰軾責授瓊州別駕昌化軍安置

五月甲子兄弟相遇於藤相與同行

六月丁亥至雷州有謝到州表 癸巳軾與轍相別渡

海往昌化有和子瞻過南海詩

十月軾有停雲詩寄轍轍次韻答之

十一月己卯廣西經略安撫司走馬承受段諷言知雷州張逢周恤安置人蘇轍及軾兄弟與之同行至雷州請下不干礙官司按罪詔提舉荆湖南路常平董必具實狀以聞

十二月癸未新州安置劉摯卒 己亥有和陶詩集序

元符元年戊寅

二月軾以轍生日有沈香山子賦贈轍轍和以答之

丙申詔差河北路轉運副使呂升卿提舉荆湖南路常平董必並充廣南東西路察訪時有告劉摯在政府謀廢立者責惇蔡卞欲因是起大獄嶺表悉按誅元祐臣

僚故遣升卿等 戊申長星見

三月癸丑詔呂升卿等差充廣南東西路察訪指揮更
不施行 癸酉提舉荆湖南路常平董必言朝請郎知
雷州張逢於轍初到州日同本州官吏門接次日爲具
召之館於監司行衙又令僦進見人吳國鑑宅居止每
月率一再移廚管待轍差借白直七人海康縣令陳某
追工匠應副國鑑修宅詔轍移循州安置逢勒停諤衝
替

八月轍至循州寓居城東之聖壽寺已乃哀橐中之餘
鬻之得五十千以易民居大小十間北垣有隙地可以
毓蔬有井可以灌乃與遜荷鋤其間州民黃氏宦學家
也有書不能具時假其一二讀之題白樂天文集後
二年己卯有巢谷者自眉山徒步訪轍於循州又將見
軾於海南行至新州而卒年七十三轍爲之傳

四月二十九日有龍川略志序

七月二十二日有龍川別志序

閏九月丁丑有春秋傳後序 戊寅重陽有與父老小
飲四絕

十一月辛未有祭孫婦黃氏文

三年庚辰正月己卯哲宗崩徽宗卽位 庚辰大赦天
下

二月癸亥轍量移永州安置轍有次韻子瞻和陶淵明
雜詩十一首

四月庚戌元子生 辛亥赦天下 丁巳轍移岳州敕

曰朕卽祚以來哀士大夫失職者眾雖稍收斂未厭朕
心茲者天祚予家挺生上嗣國有大慶賚及萬方解網
卹辜何俟終日責授某官蘇轍擢自先帝與聞政機坐
廢累年在約彌厲漸還善地仍畀兵團可濠州團練副

使岳州居住轍歸至處州被命有謝狀

十一月癸亥朔敕曰朕初踐祚思赴治功敷求俊良常恐不及念雖廢棄不忍遐遺轍富有藝文嘗預機政謫居荒裔積有歲時稍從內遷志節彌厲昭還故秩仍領真祠服我異恩無忘報稱可特授大中大夫提舉鳳翔府上清宮外州軍任便居住至鄂州被命有謝表有田在潁昌府因往居馬

徽宗建中靖國元年辛巳正月己巳中太一宮使范純仁卒轍有挽詞 甲戌欽聖憲肅皇后向氏崩有慰表并挽詞三首

三月丙子有祭東瑩文 戊寅有鮮于侁父母贈告跋
五月丙戌欽聖憲肅皇后神主祔於廟室轍有慰表二首

七月丁亥軾卒於常州

九月癸亥有祭文

十月有追和軾歸去來詞

十一月庚辰祀南郊赦天下轍有賀表

十二月庚寅王東美器之妻蘇氏卒有墓志 丙申有

祭范子中朝散文

崇_卣元年壬午跋巢谷傳

四月丁未有祭王氏嫂文

五月丁卯有祭兒文 是月庚午詔蘇軾追貶崇信軍

節度行軍司馬其元追復舊官告繳納蘇轍更不敘職

名 乙亥詔蘇轍等五十餘人令三省籍記姓名更不

得與在京差遣

閏六月癸酉葬軾於汝州邾城縣小峨眉山有墓志銘有再祭八新婦文 戊寅詔轍降爲朝請大夫以銓品責籍之時差次不倫故也有謝表

八月丙子詔司馬光等子弟並不得任在京差遣太常寺太祝蘇适與外任合入差遣

十一月十三日有雪詩

二年癸未正月有補子瞻謫居僖耳唐佐從之學遷居蔡州詩

二月有寒食詩己巳有癸未生日詩

三月甲午跋楞嚴經有六孫名字說 辛丑有春盡詩

次日立夏

四月戊午有夢中詠醉人詞

六月庚午有立秋偶作詩

九月乙酉有九日詩有立冬聞雷詩

十月有罷提舉太平宮欲還居穎昌詩

十一月癸卯有次遲韻對雪一首

三年甲申正月庚寅還穎昌有甲申歲設醮青詞

三月丙子有上巳日久病不出示兒姪詩 辛卯有葺

東齋詩并初得南園詩

六月詔頒元祐姦黨姓名三百九人刻石諸州

七月丁酉有記夢詩有抱一頌有葺居五首有歲暮口

號二首

四年乙酉正月戊寅有雪後小酌贈內詩

三月庚戌有喜雨詩

五月有和遲田舍雜詩九首

七月甲寅詔元祐宰執墳寺特免毀拆不得充本家功德院並別賜敕額爲國焚修冬至雪詩有歲暮二首除

夜詩

五年丙戌

正月戊戌彗出西方 丁未大赦天下毀元祐姦黨石

刻

三月辛亥提舉南京鴻慶宮范純禮卒純禮字彝叟轍有祭文已未姪孫元老中進士第有次遲韻贈陳元倪秀才并送元老歸鄉詩有秋社分韻詩有築室示三子詩有中秋無月二首

九月有頴濱遺老傳及樂城後集序九日獨酌三首十月庚戌有大雪詩是時行大錢當十民以為病故詩中及之

十一月八日有夢中反古菖蒲詩有守歲詩

大觀元年丁亥正月庚戌詔應係籍宰執墳寺曾經放罷者並給還轍有謝表

二月有丁亥生日詩

七月乙酉朔有苦雨詩有釀重陽酒詩有九日詩有初成遺老齋待月軒藏書室三詩有送少子遜赴蔡州酒官詩二首有論語拾遺二十七章

十一月乙丑詔八寶初成可於來年正月用之

二年戊子正月壬子有正旦詩是日帝受大賀八寶赦天下轍復勅議大夫皆有謝表并焚黃文有七十吟

二月有生日詩有八璽詩

五月有夏至後得雨詩

八月癸巳有移花詩

十二月壬辰有伐雙穀詩有除日詩書老子解後

三年己丑有上元夜适勸至西禪觀鐘詩

二月庚寅有望日雪詩遜自淮康歸觀逾旬而歸有送行詩二首

八月有中秋新堂看月詩

九月有重九陰雨病中把酒示諸子詩有己丑除日詩

四年庚寅有新春五絕有上元雪詩

閏八月辛亥有雨中秋詩 辛酉有菊有黃花詩有除

夜二詩

政和元年辛卯有正月十六日一首有七十三歲作一首有七夕詩重九詩

十月戊午有雪詩四首有冬至詩除日詩有樂城第三集序卜居賦再題老子解後

二年壬辰有壬辰年寫真贊

二月有壬辰生日詩記胸中所懷自作一首

五月十九日有喜雨詩有送遲赴登封丞詩

八月辛亥題蔡幾先海外所集文後

九月庚申有墳院詩 是月壬午中大夫轍轉大中大夫致仕轍居潁昌十三年潁昌當往來之衝轍杜門深

居著書以爲樂謝卻賓客絕口不談時事意有所感一

寓於詩人莫能窺其際

十月三日轍卒年七十四

十一月乙丑追復端明殿學士特賜宣奉大夫

七年三月二十五日夫人史氏卒同葬汝州郟城縣上

瑞里三子遲字伯充官至大中大夫工部侍郎徽猷閣

待制紹興二十五年卒适字仲南官至承議郎通判廣

信軍宣和四年卒遜字叔寬官奉議郎通判瀘州潼川

府靖康元年卒五女文務光王適曹煥王浚明曾縱其

壻也務光字逸民適字子立煥字子文縱字元矩遲二

子簡策适三子籀範築遜四子筠箴箱登轍有詩傳二

十卷春秋集傳十二卷老子解二卷樂城集後集第三

集共八十四卷應詔集十二卷子瞻評其文以爲子由

之文實勝僕而世俗不知乃以爲不如其人深不願人

知之其文如其爲人故汪洋澹泊有一唱三歎之聲而其秀

傑之氣終不可沒轍少讀太史公書患其疏略漢景武

之閒尚書古文詩毛氏春秋左氏皆不列於學宮世能

讀之者少故其所記堯舜三代之事多不合聖人之意
戰國之際諸子辯士各自著書或增損古事以自信其
說一切信之甚者至采世俗之語以易古文舊說及秦
焚書戰國之史不傳於民間秦惡其議已也焚之略盡
幸而野史一二存者遷亦未暇詳也故其記戰國有數
年不書一事者於是因遷之舊上觀詩書春秋旁取戰
國策及秦漢雜錄起伏義神農訖秦始皇帝爲七本紀
十六世家三十七列傳謂之古史凡六十卷晚在海康
刊定舊解老子寄子瞻子瞻題其後曰昨日子由寄老
子新解讀之不盡卷廢卷而歎使戰國有此書則無商
鞅韓非使漢初有此書則孔老爲一使晉宋閒有此書
則佛老不爲二不意老年見此異特及歸穎昌時方詔
天下焚滅元祐學術輒敕諸子錄所爲詩春秋傳古史
子瞻易書傳論語說以待後之君子復作易說三章及

論語拾遺以補子瞻之闕其論大衍之數五十天地之
數五十有五盡埽古今學者增損附會之說得其本真
既沒籀等述其緒訓爲穎濱遺語一卷紹興中以遲貴
累贈太師封魏國公史氏楚國太夫人

光緒乙酉十一月從大典卷二千三百九十九卷錄
出

蘇穎濱年表一卷宋孫汝聽撰陳振孫書錄解題載
三蘇年表三卷右奉議郎孫汝聽編大典止收老泉
一卷穎濱一卷館臣著於存目今不特原書失傳卽
大典本亦不見昔年在館從大典蘇字韻錄出又失
去老泉一卷此書紀載翔實究勝於後代所編者惟
轉輾鈔訛再取穎濱遺老傳及詩文集較之十得八
九矣宣統己酉九秋江陰繆荃孫跋

蘇穎濱年表

萬七千二百十九



蘇穎濱年表



